

“Er ekki gott að vera til?”

(Baldur Fróði 1. bekk)

Fréttabréf úr Sælukoti í apríllök 2008

Kæru foreldrar

Vorstemmningin er ríkjandi í Sælukotinu þessa dagana. Fleiri og fleiri eru farnir að labba sjálfir heim, ráða sjálfir hvort þeir eru í kotinu og eins fara fyrr heim á daginn. Það er því fámennara og rólegra hjá okkur núna eins og alltaf á vorin. Við stefnum á að vera mikið úti þegar veðrið er gott og bara reyna að njóta lífsins eins og alltaf. Fyrirsögn bréfsins er spurning sem að ég fékk frá einum Sælukotsbúanum fyrir helgi og sló algjörlega í gegn hjá okkur. Mig langar mest til að gera þetta að slagorði Sælukots!

Annars er ýmislegt að gerast í starfsmannamálum eins og venjulega. Kristján eignaðist son síðastliðinn laugardag. Benedikt bumbubúi (eins og hann var kallaður alla meðgönguna) mætti í heiminn 15 merkur og 52 cm – ótrúlega flottur eins og pabbinn ;) Kristján er líka í prófum í HÍ þessa dagana og kemur ekkert aftur til starfa hjá okkur. Hann á nú samt örugglega eftir að kíkja í heimsókn og sýna okkur dýrgripinn sinn.

Þórunn og Jóhanna eru líka í prófum. Þórunn í KHÍ og Jóhanna í HÍ. Þær koma nú samt eitthvað í mýflugumynd til að hjálpa til. Vladimír fór í síðustu viku til Slóvakíu í próf þar. Hann er að klára lögfræðina og þarf að fara mánaðarlega til að taka próf. Ég og Andri erum alveg laus við prófavesen og brosum bara í góða veðrinu. Já reyndar líka því slæma.

Ég hef sagt upp störfum og þetta verður því seinasti veturinn minn sem kóngur í Sælukoti. Ég hef talsverðar áhyggjur af því að finna aldrei aftur stöðu með konunglegum titli. Meira á ég þó eftir að sakna barnanna ykkar sem að ég kalla þó yfirleitt börnin mín. Þetta hefur verið mjög skemmtilegur og lærdómsríkur tími en það er kominn tími til að ég snúi mér að öðrum verkefnum og vil hafa meiri tíma fyrir músikþerapíuna og mín eigin börn. Ég klára veturinn og kem Sælukotskóngi II inn í starfið fyrir næsta skólaár.

Ég stefni á vorhátíð Sælukots um miðjan eða seinni hluta maí. Föstudagarnir 16. og 23. koma vel til greina en það er eiginlega skilyrði að veðrið sé gott. Ég hef nefnilega í huga að halda hátíðina úti. (Þrátt fyrir minningar um foreldra í jakkafötum og háhæluðum skóm í fyrra ha ha). Mig langar mikið til að reyna að safna saman því starfsfólki sem að hefur unnið hjá okkur í vetur og eins virkja ykkur foreldra meira en áður. En meira um það síðar.

Hafið það gott!

Perla